

你佇風中行來

Nylon 你敢有聽見？有人咧叫你
今仔日，台北的天頂特別曠闊清明
雲厝仔自由飄來徙去，親像27年來
我想欲寄予你的批信，無數次來回
佇這片厚厚的雲頂，攏無消息

Nylon 我坐踎觀禮台頂，微微風中
你直直行來，若像駛過彼陣
臭火燒閣簽 kàng 的煙霧
面容沉穩閣堅定，是遐爾 tshiünn
切·格瓦拉，一種哲學家的憂鬱
革命家視死如歸 悲壯的表情
這群穿烏罩衫的少年家，飄撇倚咧身邊
將你的面模仔愈擰愈近，愈看愈清
熟似的驚喜，又淡薄仔哀傷的生份
佇朗朗青天下，猶閣熠著火影的青春
彼个 牢佇夢中思念的面形

Nylon 咱總算行到囉，龍山寺到總統府
短短的1.6公里路，你煞愛行30年
濟濟人，用目屎恰意志查查仔
鋪平一條叫做民主的坎坷路面
1989年彼葩烈火，嘛已經燒破熔斷
鉛線網仔圍造的牆，恰捆縛台灣人
心魂，彼塊銅鑄鐵拍的神主牌仔
日光下，紅絳絳的雜誌框著大大兩字
像你一生的志業，用血色拭光了時代
將赤焰身軀，燒烙交予你所熱愛的土地
向望，換來島國眾人的言論自由

Nylon 你大四正行過我的眼前，無話語
咱只是恬恬相對，愛恰放揀的憂悶
曾經，纏綿的相思佇長長夢境未醒
此時，澹溼的目矙內你的微笑
成做，今生散放的安慰

Nylo 你已經行遠我的身軀邊，無越頭
你薄版的身形，佇風中漸漸消瘦
雄雄我才發現，千萬蕊的目矙
投向你的背影，字跡流過時間

「哲學家被處死之時，山河都將流淚」

這是你寫過的話，從今以後

毋是歷史 是

真理

註：「記2016年520蔡英文總統就職典禮——鄭南榕肖像遊行隊伍行過總統府。」

2016年520蔡英文總統就職典禮，彼工，鄭南榕肖像遊行隊伍行過總統府。觀禮台頂葉菊蘭女士激動流目屎：「30年，我總算看著Nylon行到總統府囉。」畫面感動千萬人。

鄭南榕（1947–1989），Nylon 鄭南榕的英文名Nightlong 省去兩個尾音。